

Persvadì da la valur da las occurrentzas sportivas

■ (anr/ac) **La regenza grischuna è persuadida da la valur da grondas occurrentzas sportivas per il chantun Grischun. Tranter ils onns 2012 e 2015 ha ella puidi augmentar las contribuziuns chantunalas a favur da diversas occurrentzas. Per ulteriurs augments na vesa la regenza dentant nagin spazi.** La valur dad events sportivs n'è betg discutabla per la regenza grischuna pertutgant la plivalur turistica directa, ma era pervia da l'effect da reclama ed a favur da l'economia regiunala. Quai scriva la regenza sin ina dumonda dal deputà *Roman Paterlini* (pcd Alvaschagn). Ina dumonda inoltrada a chaschun da la sessiun dal favrer passà. La regenza ha menziunà en sia resposta l'instrumentari legal a disposiziun a la regenza per pudair contribuir a las occurrentzas sportivas. Tranter ils onns 2012 e 2015 ha la regenza puidi augmentar las contribuziuns da 0,335 milliuns francs sin 0,5 milliuns francs. Per l'onn current quinta la regenza cun circa 0,6 milliuns francs tenor las contribuziuns gia concedidas e planisadas. Ella scriva che l'augment da las contribuziuns saja sulet stà pussaivel cun spargnar en auters secturs da la promoziun economica. In ulteriur transfer da daners entaifer la promoziun economica na saja betg pussaivel, scriva la regenza e fa attent als gronds posts da la politica regiunala da la confederaziun u als credits d'obligaziun che na dastgian betg vegnir duvrads per autras occurrentzas. Plinavant ha la regenza fatg attent al plan da finanzas 2017 enfin 2020 che na prevedia betg in augment da las contribuziuns.

La regenza ha Plinavant prendì posiziun sin la dumonda sch'i saja pussaivel da contribuir als organisaturs dad occurrentzas sportivas per pudair far reservas per ils proxims onns. La regenza

fa valair che la promoziun dad occurrentzas saja concepida per segirar la finanziaziun restanta. Ni la lescha davart las finanzas ni la legislaziun speziala prevedian contribuziuns a favur da reservas per occurrentzas futuras. Cun conceder garantias da deficit sappia il chantun minimar als organisaturs il ristg da custs betg cuverts sin fundament da schabetgs na calculabels. Reducir las contribuziuns per segirar eventuels deficits a favur da contribuziuns fixas pli autas na vesa la regenza betg per opportun ed ella è da l'avis da betg cuntanscher la finamira cun ina tala midada.



Romano Paterlini (pcd Alvaschagn) è s'interessà per las contribuziuns ad events sportivs.